

В
О
Д
И
Х
О
В

НИДО

ДОСТОИНАР

Н
И
Х
О
Р
К
Э

«ТОШКЕНТ»
БАДИИ
АДАБИЁТ
НАШРИЕТИ
1965

Она ернинг бташ қаъридан
«Ўғлим!» деган нидо келади.

Ха, бу келажак деб, Ватаним, халқим, ўн
деб жангда қурбон бўлган ота нидоси. Оталари
жавобан шоир достон билан ўз авлоди нидосин.
шеърга солади. Куйдай равон, куйдай тўлқинли
ҳаяжон нидоси бу. Отага фарзанд жавоби.

Буюк ҳаёт тонги доҳиймиз Ленин туғилган
кундан бошланган. Шоир доҳий ёшлигини ёш-
ликдек тиник, тонгдек мусаффо сатрларга жой-
лади.

Орзу чашмаси тиним билмай қайнагани қай-
наган. Ў ҳаётнинг мангалиги, севгининг боқийли-
ги демакдир.

Уч достон. Булар шоир орзу чашмасидан қай-
наб чиққан тўлқинлар. Қалбингизда тўлқинлар
үйғотар деб умид қиласиз.

Воҳидов Эркин.

Нидо. Достонлар. Т., «Тошкент» бг иий
адабиёт нашриёти 1965.

88 бет. Тиражи 10 000.

Вахидов Э. Призыв. Поэмы.

Ўз2

НИДО БАФИШЛОВ

Ҳайқираман,
Тоғлар бағридан
Гумбурлаган садо келади,
Она Ернинг оташ қаъридан
«Үғлим!» деган нидо келади.
«Үғлим!..»
Вужудимни чулғар аланга,
Бўғзимга тиқилар ҳаяжон.
— Мана мен,— ўғлингиз,
Дардли оламга
Сиздан танҳо ёдгор,
Сўйланг, отажон!
Сўйланг, бир дақиқа қулоқ солайн.
Овозингиз тинглаб түёлмаганман.
Бир марта йўқотиб тополмаганман,
Хаёлимда тиклаб олайн,

Отажон!

Мен ахир қутлуғ бу сўзни
Йигирма йил олмадим тилга,
Йигирма йил сақладим дилда
Армонли ўғлингиз тинглайди сизни,
Сўйланг, эшитаман...
Вужудим тилка.
Юрагимни ёқар ўтли изтироб,
Аммо кўзларимда бир томчи ёш йўқ.
Бағрим ўйиб
Букун менга бермоқда азоб
Сизнинг кўксингизни тешган қора ўқ.
Силқиб оқаётир
Кўкрагимдан қон.
Қалбим ўртамоқда сўнгсиз армоним...
Юрак қоним билан битган достоним
Сизга бағишладим,
Отажон!

Хаёлнинг туманли пардаси аро
Ииллар кўз олдимда чарх ураётир.
Қишлоқ кўчасидан занжидай қаро
Олов болалигим югуряётир.
Дунё қайғусига бўлмаган ошно,
Қаҳ-қаҳ ураётир
Барқ ураётир.
Билмас, боши узра булутли само
Чақмоқ чақаётир,

Гулдураётір.
Билмас, яраланған бу мажруҳ дунә
Қасос сұраётір,
Бонг ураётір...

Қадамлар,
Қадамлар,
Оғир қадамлар...
Этиклар зарбидан титрайди тупроқ.
Қаерга кетмоқда шунча одамлар?
Наҳотки йұллари шунчалар йироқ!
— Ана, күряпсанми?
Менинг дадамлар!
Дада!!!—
Овозым ҳеч чиқмайди бироқ.
Югураман — ортга кетар қадамлар,
Йиғлайман — күзимга келмайди намлар,
Мурғак вужудимда фақат зұр титроқ!
Бұғзимда аламлар,
Аччиқ аламлар.
Йұлнинг ўртасида турибман.
Шу чоқ —
Поезд қичқиради.
Тұхтанг, одамлар!
Қайга кетмоқдасиз?
Қани дадамлар?!
Тепамда ёнади зангори чироқ...
Чүчиб уйғонаман

Онам қошимда.
Меҳрибон қўллари
Оташ бошимда:
— Нега йиғлаяпсан,
Елғизим, қўзим?
Тун узоқ, ухлайқол,
Кўзларингни юм.
Ором ол, мен сенга
Аллалар айтай.
Тонгда пешонангдан
Упид уйғотай.
Ана, деразангга
Қўнибди ҳилол.
Бошингга эгилиб
Сўрмоқчи савол.
Сенинг кипригингга
Сочмоқ бўлиб зар,
Ҳилол теграсида
Ўйнар юлдузлар.
Мен сенинг баҳтингман
Дегандай гўё
Имлаб чорламоқда
Еқут сурайё.
Сеникидир булар,
Сеники бари.
Сеники осмоннинг
Зар қандиллари.
Сомончининг йўли

Сенинг йўлларинг.
Узатсанг Зуҳрога
Етар қўлларинг.
Үлғай, болажоним,
Үлғайгин тезроқ.
Сенинг йўлларингга
Юлдузлар муштоқ.
Ҳозирча ором ол,
Ёлғизим, қўзим.
Тун узоқ, ухлайқол,
Қўзларингни юм.
Олис соҳилларда
Уфқдан нари
Ўлим сочмоқдадир
Ёв қузғунлари.
Ўлим сочмоқдадир
Элга беаёв.
Шаҳар, қишлоқларни
Ютмоқда олов.
Уша олис юртда
Қон кечиб ҳозир
Отанг ҳаёт учун
Жанг қилаёттир.
Элларнинг эрк деган
Соф тилаги деб,
Жаҳоннинг нурафшон
Келажаги деб,
Офат солмасин деб

Оlamga қотил,
Отанг узоқ юртда
Жанг қилаётир.
Сен учун, мен учун,
Уз учун әмас,
Фақат ўзбек ва ё
Рус учун әмас,
Бутун Ер — ундағи
Бор авлод учун,
Дунёда энг құтлуғ
Әътиқод учун.
Узоқ ўлкаларда
Қон кечиб ҳозир
Отанг ҳаёт учун
Жанг қилаётир.
Сен ухла, ёлғизим,
Сен ухла, құзим.
Бир нафас ором ол,
Күзларингни юм.

Бу кунлар албатта
Үтиб кетади.
Башар жароҳати
Битиб кетади.
Она ер қайтадан
Яшарар бир кун.
Олам нур қўйнида
Яшнар лолагун.

Жангу жадалларга
Келур интиҳо,
Бизнинг дунё бўлур
Урушсиз дунё.
Бу кунлардан қолур
Фақат хотира.
Аммо ҳалқ жафони
Унутмас сира.
Бу кунлар кетару
Ғам, доғи қолур.
Юракларга солган
Фирғони қолур.
Авлод авлодларга
Замон замонга
Абадий, абадий
Сабоги қолур.
Сен ҳам унутмассан
Юрагим, қўзим.
Ҳозирча тинч ухла,
Қўзларингни юм.

Вақт келар, улғайиб,
Одам бўларсан.
Илм олиб соҳиби —
Олим бўларсан.
Сен бизлар кўрганни
Кўрмагайсан ҳеч,
Ғурбат йўлларидан

Юрмагайсан ҳеч.
Оlam тўла қуёш,
Қалбинг тўла нур.
Ойдин бир замонда
Яшайсан масрур.
Бизлар ҳам ўтамиз
Вақт келиб бир кун.
Сизларга қолади
Муқаддас замин.
Сиз уни авайлаб
Қафтда тутасиз.
Шараф йўлларидан
Олиб ўтасиз.
Оташ алангага
Тутмайсиз уни,
Даҳшат уммонига
Отмайсиз уни.
Замин теграсига
Олтин камалак
Ўрайди етти хил
Нурдан чамбарак.
Сиз унинг бағрини
Пора қилмайсиз
Оталар хокини
Сақлаб муборак.
Сен шундай давронда
Яшайсан қўзим.
Ҳозирча ором ол,

Кўзларингни юм...
Бошимизда оташин фалак,
Пойимизда оташин тупроқ.
Кўлимизда ёғоч камалак,
Остимизда ёғоч арғумоқ.
Оппоқ чангдир эгну бошимиз,
Оппоқ чангдир кўзу қошимиз.
Кўру кармиз,
Бешдан олтига
Эндиғина ўтган ёшимиз.
Кўча-кўйда кўтариб сурон
Югурмиз саҳардан то кеч,
Оlam узра кезар зўр бўрон,
Биз бу ҳақда ўйламаймиз ҳеч.
«Уруш-уруш» ўйин бўлса бас,
Титратамиз кўку заминни.
Ким ўйлабди дейсиз у нафас
Бу урушнинг ростакамини.
Бурчаклардан бир-биримизни
Ёғоч милтиқ билан отамиз,
Биз билмаймиз:
Қайбиrimizning
Ўққа учди бу вақт отамиз.
Кўксимизни ушлаганча жим
Ииқиламиз,
Ўлган бўламиз,
Биз дунёда ростакам ўлим
Борлигини қайдан биламиз?!

Даҳшат солиб кезаркан у дам
Узоқларда жанг гулдуроси,
Бизнинг қишлоқ кўчасида ҳам
Янграп әди
Акси садоси.

* * *

Қуёш ботар,
Оқшом чўкар кўча-кўйга,
Тарқаламиз уй-уйгаю, тепа тўйга.
Тун бошланар.
Менга чарчоқ билинмайди,
Кипригимга уйқу сира илинмайди.
Мурғак фикрим етаклайди хәёлларга,
Онам қўйнин тўлдираман саволларга.
«Айтинг, ая, менинг дадам қаҳрамонми?
Тоғларни ҳам қулатувчи паҳлавонми?
Тўппончаси борми унинг чўнтагида?
Орденлари жуда кўпми кўкрагида?
Менинг дадам самолётда учадими?
Осмонлардан парашютда тушадими?
Уткир пўлат қиличини қўлга олиб,
Душманларнинг юрагига қўрқув солиб,
Катта жангга кирадими ёлғиз ўзи?
Шапкасида ёнадими беш юлдузи?
Айтинг, дадам мени яхши кўрадими?
Келганида тойча олиб берадими?
Кўчаларда тойчоғимни етаклатиб,

Қўлларимдан ушлаб олиб юрадими?
Уша кунлар тезроққина бўлақолсин,
Айтинг, дадам хаялламай келақолсин.

44 йил.

Сентябрь тонги отди.

Мени чексиз қувонч билан баҳт уйғотди.
Кўк жилдимда алифбе ва бир бурда нон,
Биринчи бор қадам қўйдим мактаб томон.
Ўйинлардан анча әрта тўйган эдим,
Китобларга барвақт ҳавас қўйган эдим.
Ед билардим алифбенинг ҳарфларини,
Ўқир эдим информбюро хабарини.
Жуман «пошта» дадамдан хат келтирган

кун

Катта байрам бўлар эди менинг учун.
Ўқир эдим юз хижжалаб, юз тутилиб,
Такрорлардим йиртилгунча хат титилиб.
Яйрап эдим маъносини уқарканман,
Дадам хатин ўқиб савод чиқарганман.

Букун яна хат олганмиз,
Ажойиб хат.

Госпиталдан чиққан эмиш соғ-саломат.
Бошидаги жароҳати битган эмиш,
Ҳатто ўрни билинмасдан кетган эмиш.
Берлин томон тушар энди йўлим дебди.
Хат сўнггида, яхши ўқи, ўғлим, дебди.
Шу кун тунда уч чизиқли дафтаримга,

Оро бериб катта-катта ҳарфларимга,
Хира чироқ ёруғида кўз ишқалаб —
Дадамга хат ёзмоқ учун сурдим қалам.
«Дадажон!

Мен сизни жуда соғиндим.
Соғиндим иккала кўзим билан тенг.
Келиб қолармишсиз эртами индин,
Аям шундай деди,
Ростми шу, айтинг?!

Дада,
У кун сизни тушимда кўрдим.
Оқ отда келдингиз,
Сўрадингиз сув.
Мен буни аямга гапириб бердим.
Даданг келади, деб айтди,
Ростми, шу?..

Рустамнинг акаси урушдан қайтди,
Қўлтиқтаёғи бор,
Бир оёғи йўқ.
Рустам айтиб берди:
Атака пайти
Тиззасидан олиб кетган эмиш ўқ...

Хол ака қайтганди уйга тўсатдан,
Үғли, дадажон, деб чопиб келибди.
Ота қучай деса қўли йўқ экан,
Тик турган жойида йиглайберибди.

Дарсга келмай қолди
Тунов кун Тальят.
Муаллим урушса тураберди жим.
Дадасидан келган экан қорахат.
Ҳаммамиз йиғладик
Ҳатто муаллим...

Дадажон!
Сизга ўқ тегмасин ҳечам,
Мен учун ҳам тезроқ қайтинг саломат,
Бувим айтган,
Агар мен тилак қилсам
Тилагим бўлармиш доим ижобат.
Рост айтаман,
Сизни жуда соғиндим,
Соғиндим иккала кўзим билан teng,
Келиб қоласизми, ёртами индин?
Кутаман,
Дадажон,
албатта келинг».

Хижрон кечалари ғоятда узун,
Айрилиқ йўллари олис ниҳоят.
Кўчага чиқаман юз бора ҳар кун, .
Кўзларим нигорон,
Келармикан хат.
Тонгда турганда ҳам,
Кун ботганда ҳам,

Ҳатто кечалари қилолмай тоқат,
Эшикка қарайман,
чекаман алам.
Интизор бўламан,
Келармиқан хат.
Мен қайдан билибман,
Йўл босар экан
Менинг мурғак хатим бекатма-бекат,
У ёқдан,
Худди у борар манзилдан
Йўлга чиққан эди машъум қораҳат.

Қош, кўзларинг отангга ўхшар
Дейишади, билганлар доим.
Сўнг хўрсиниб қўшиб қўйишар:
Ўхшамасин умринг, илойим.
Отам тутган машъални ушлаб,
Ўша йўлдан бораман мен ҳам.
Майли эди
Отамдек яшаб
То сўнгги дам
унга ўхшасам.
Боболарнинг ҳикмати
Ҳаётга ёруғ йўлдир.
Отанг боласи бўлма
Одам боласи бўл, дер.
Бу сўзни илк бор менга
Үргатган отам эди.

Мен отам фарзандиман,
У эса одам эди.
Қирқ биринчи йилларнинг
Даҳшати кўз олдимда,
Гўдак эдим, отами
Кузатганим ёдимда.
У кўплар баҳти учун
Кирар экан зўр жангга,
Онам бошимни силаб
Ўхша, деган отангга.
Менинг мардлик мактабим
Коммунист отам эди,
Мен отам фарзандиман,
У эса одам эди.
Мен отам босиб ўтган
Қонли йўлни ўтмасман.
Аммо шонли ҳаётин
Бир умр унутмасман.
Она-Ватан кўксига
Қалқон бўлган отамнинг
Кўплар баҳти йўлида
Қурбон бўлган отамнинг
Азиз номин қалбимда
Виждонимдек сақладим.
Унинг ўлмас руҳини
Шод этмоқдир мақсадим.
Умримни фидо этай
У жон берган Ватанга.

Эл мендан рози бўлсин
Ушабсан, деб отангга.

Қузғуннинг қанотидай
Қаро эди ўша тун.
На милт этган юлдуз бор,
На йилт этган бир учқун.
Кеч куз эди,
Тунд кеча,
Ер, кўк мунгли, борлиқ ғаш,
Қор эзғилаб ёғарди
Ёмғир билан аралаш.
Сукунат.
Жанг тин олар,
Фақат гоҳи гоҳида
Мушак учиб сўнади
Душман қароргоҳида.
Ярим тун зулматида
Тепаликни қоралаб
Тўрт соя эмакларди
Чакалакзор оралаб.
Ҳар замон тўхтаб-тўхтаб
Ҳордиқ олишар эди,
Жим қолиб сукунатга
Қулоқ солишар эди.
Мана, улар ўрмоннинг
Чеккасидан ўтдилар
Ва ниҳоят дарёнинг

Соҳилига етдилар.
Тўхтадилар, бир нафас
Кўз тикдилар йироққа.
Атроф жим,
Фақат дарё
Уриларди қирғоққа.
Сирли тун, бутун борлиқ
Сехрланган сингари.
Шундай кеча тўртовлон
Йўл олмишлар қай сари?
Қай манзилга шошишар
Шу совуқда, шу намда?
Гўё қор бор,
Ёмғир бор,
Тун бор фақат оламда...
Автоматлар бош узра
Кўтарилиди туғсимон.
Бирин-кетин дарёдан
Сузиб кетди тўртовлон.
Жим, шарласиз сузишар.,
Яқин қолди қирғоққа,
Ет, нотаниш товушлар
Эшитилар қулоққа.
Мана соҳил — тик қирғоқ,
Атроф яланг,
Наридা
Икки душман соқчиси
Кўринар тун бағрида.

Бир-бировга тикилди
Бир сўз демай тўрт жуфт кўз.
Шу қарашнинг ўзида
Айгилганди барча сўз.
Тек қотдилар.
Командир
Имо қилди ниҳоят,
Тун бағрига эмаклаб
Кириб кетди тўрт соя.

Ногаҳон ўқ отилди,
Ўт чақнади кетма-кет.
Душман сезди,
Разведка
Жангга кирди бетма-бет.
Граната портлади,
Тилга кирди автомат.
Бир ёчда бутун бир полк,
Бир ёнда тўртта солдат.
Икки ёндан ўқ ёғар,
Олов ёғар бешафқат.
Бир томонда таҳлика,
Бир томонда жасорат.
Үртада текис кенглик,
Үртада қуюқ зулмат.
Бир томонда ёвузлик,
Бир томонда адолат.
Қанча давом этди жанг

Билар фақат қаро тун.
Билар фақат тепалик,
Аммо булар лол ва гунг.

Тонгга яқин қор тинди,
Аста ёришди осмон.
Тепаликка илк нурин
Сочди хуршиди жаҳон.
Бунда ерни қучганча
Тошларга қўйиб бошин,
Тўрт ўғлон тинч ухларди
Кўкрагида қўрғошин.
Тунги оғир жангдан сўнг
Гўё тин олар бари,
Она бағрида ётган
Маъсум гўдак сингари.
Шу тонг сабо йиғлади
Чидолмай бу фироққа.
Шу тонг дарё йиғлади
Бошин уриб қирғоққа.
Оқ, момиқ булутларнинг
Бағри чок-чок сўкилди.
Шу тонг офтоб нурлари
Кўз ёш бўлиб тўкилди.
Ўрмонлар шовиллаган
Олис юртда ҳали ҳам
Номсиз тепалик узра
Ухлаб ётибди отам.

* * *

Ерни тепма,
Аста бос қадам,
Етар унинг чеккан озори.
Биз турган Ер,
Биз кезган олам
Улкан
коммунистлар мозори.
Тенгдошим,
Асрдош биродар!
Кел, бир он жим ўйга чўмайлик
Бу ерда
ётибди
фидолар.
Кел, уни
гулларга
кўмайлик.
Бу ерда
бахт бўлсин,
нур бўлсин,
Бўлмасин,
қаро тун
зулмати.
Бу ерда
юраклар
ҳур бўлсин,

Қайтмасин,
у кунлар
даҳшати.

Тенгдошим,
асрдош биродар!
Уйғоқ бўл,
ҳушёр боқ
оламга.

Бу ерни
құчмасин
аланга,
Қабрида
тинч ётсин
фидолар.

Эшит,
инграйяпти
Она Ер

Қўлтиқтаёқларнинг
захмидан,

Бу тупроқ
юраги
порадир
Атом зонтларининг
ваҳмидан.

Эшит,
чорляяпти
Она Ер,

Кўксида
оловли
оҳ-фарёд.
Асрдош биродар,
қўлни бер,
Кел, Ерга
қилайлик
қасамёд:
Бўлурмиз
гал келса
ҳар биримизга
Тинчлик жангтохининг
фидоси.
Бу сенга,
бу менга,
бу бизга
Йигирманчи аср нидоси.

Йироқларда қолди
Уқубатли йиллар.
Ер остида ётар топганлар завол.
Қолганлар умрнинг
Сарҳисобин қилас.
Соч оқига боқиб сурарлар хаёл.
Йиллар ўтди-кетди
Довулини қоқиб,
Тупроққа берилди не-не азиз жон.

Бизлар хаёлларнинг
Тўлқинида оқиб,
У кунлар ҳақида ўқиймиз достон.
Аммо ўлганларга
Шеър, достондан не наф,
Не фойда йиглашдан қалб дардин айтиб.
Минг йил шон ўқисак,
Минг йил десак шараф,
Кетганлар дунёга келмайди қайтиб.
— Нега өгилмасин
Одам кетса одам
Устунга зўр қелар қуласа устун.
Бу ташвишли дунё,
Сермашаққат олам
Бизнинг елкамизда қолди-ку, дўстим!
Уни бўронлардан,
Қуёшли йўллардан
Нурли истиқболга олиб ўтамиз.
Биз уни олганмиз
Табаррук қўллардан,
Табаррук қўлларга элтиб тутамиз.
Авлодлар учун ҳам
Қутлуғ бўлар албат
Ер узра тўкилган кўз ёш, қон ва тер.
Бепоён кенгликда
Чарх уради абад
Улкан юрак шаклидаги Ер.
Бизлар ҳаво эдик,

Бир гиёҳ эдик,
Томчи шабнам эдик
Ва қатра зиё
Боболар бизни деб,
Шу ҳаётни деб,
Машъал кўтарганда
Зулматлар аро.
Биз ҳали ёш эдик.
Биз гўдак эдик,
Бир парча эт эдик,
Мурғаккина жон.
Оталар бизни деб,
Шу ҳаётни деб,
Бегона элларда
Бўлганда қурбон.
Унутмам!
Унутмам!
Унутмам сира
Муборак номларин
Шеъримда айтиб.
Уларнинг табаррук
Хотирасига
Дўстим, оёққа тур,
Ўлтирма қайтиб!
Қайтиб ўлтирма ҳеч
Қутлуғ байроқни
Муқаддас манзилга
Элтмагунингча!

Қайтиб ўлтирма ҳеч
Она тупроқни
Бу дунё жаннати
Этмагунингча!
Коммунизм деган
Қутлуғ тушунча
Дунёда барқарор
Бўлмагунча то,
Оталар руҳини
Шод этмагунча,
Қайтиб ўлтирмоққа
Ҳаққинг йўқ асло!

1964.

БУЮК ҲАЁТ ТОНГИ

В. И. Лениннинг ёшлиги ҳақида достон

Мени укпар қанотида
Олиб учар ўйларим.
Буюк Инсон ҳаётидан
Мен бир достон ўйладим.
Қаршимда бу тоғдек юксак
Мақсад турар улуғвор.
Қанча билим, санъат керак,
Менда на бу, на у бор.
Куч синамай шеъриятда,
Бирор достон битмасдан,
Дурустроқ шеър ёзиб ҳатто
Элга манзур этмасдан,
Бу чамандан узмай бир гул,
Қамол топмасдан ҳали,
Қандай журъат этди кўнгил
Бу ишга қўл ургали?

Ҳали шеърим парвози паст,
Темирқанот куйларим.
Дилда фақат эзгу ҳавас,
Фақат ширин ўйларим.
Илҳом берган ёш Ильичга
Муҳаббатим зўр холос.
У бошлаган буюк ишга
Садоқатим зўр холос.
Достон ўйи бир чўғ бўлиб
Тушди мурғак кўнглимга.
Ез дедию, шавққа тўлиб,
Қалам тутдим қўлимга.

СИМБИРСКДА ВАХОР

Кўклам келди, зумрад кўклам
Симбирск шаҳрига.
Ёйди яшил барқут гилам
Она ернинг бағрига.
Ўрмон тўлди қуш сасига,
Қуйлаб оқди ирмоқлар.
Байрам қилиб чаккасига
Чечак тақди қирғоқлар.
Гул боғларга еллар кўклам
Нафасини уфурди.
Ердан қору мовий кўкдан
Булутларни супурди.

Шўх жилғалар Волга ёқقا
Чулдурашиб чопдилар.
Она очган кенг қучоққа
Пилдирашиб чопдилар.
Нурга бағрин очиб турар
Қулоч ёйиб ҳар гўша...
Сув лабида ўйнаб юрар
Петя билан Алёша.
Севинчларнинг чеки йўқдир,
Оlam кўзга беғубор.
Улар учун дунёда бир
Баҳор бору шодлик бор.
Еш дилларнинг ташвиши йўқ,
Дунё билан иши йўқ.
Эҳ, бола-да, бепарво, шўх,
Кўй дейдиган киши йўқ.
Ахир дарё тошқин, шу чоқ
Сув лабида ўйнарми?
Нечун қўймоқ
Сувга оёқ,
Ииқилишин ўйларми?
Серафим чол соғ-саломат
Чиқди қишдан, азобдан,
Жилмаяр шод, кўп аломат,
Баҳра олар офтобдан.
Нафас олар Фомич тўйиб,
Тўлса ҳамки кўз ёшга —
Манглайига қўлин қўйиб

Ҳадеб қарар қуёшга.
Баҳор келди рус шаҳрига,
Ҳамма ёққа тўлди нур·
Баҳор келди,
Тун бағрида
Ярқ этгандай бўлди нур.
Оч-тўқликни,
Бор-йўқликни
Унутгандай олам шод.
О, қуёшни, ёруғликни
Қанча севар одамзод!

Мен севаман рус халқини,
Табиати беғубор.
Мен севаман рус халқини,
Қалби тўла завқи бор.
Мен севаман рус халқини,
Қиши, кўклам тенг унга ёр...
Далаларда ўз ҳаққини
Тиклар яна навбаҳор.
Яна ўша мушкул ҳаёт,
Иш дамлари бошланур.
Яна ором, тинч уйқу ёт,
Қиши ғамлари бошланур.
Яна минг хил азоб билан
Кулбаларда кун ўтар.
Яна тонгда ғазаб билан

Қичқиради заводлар.
Баҳор келар — нурдан холи
Бурчакларда қор ётар.
Баҳор келар — кулмас толе,
Юракларда зор ётар...

Қани шундай баҳор бўлса,
Оlam узра ёйса гул.
Қани шундай баҳор бўлса,
Қетмас бўлиб келса ул.
Борлиқ олам одамзодга
Доим бўлса беғубор,
Қани бўлса ҳаёт ўзи,
Турмуш ўзи бир баҳор!
Меҳнат севган одамни у
Хор-зор этиб қўймаса,
Бу ҳаётда инсон мангу —
Яшасаю, тўймаса!
Одам учун бўлса йилнинг
Барча фасли тенг азиҳ!
Шуни ўйлаб,
Қирғоқ бўйлаб
Келар бир ёш гимназист.
Қўклам кўрки, жамолига
Боқиб ўтиб боради.
Тонгнинг майин шамолига
Қўкрак тутиб боради.

Ўйчан кўзлар ичра гўё
Чўкмиш тиниқ осмон.
Ўйлар, ўйлар...— Тошқин дарё!
Баҳор — шодлик... нур... инсон...
Теграсида еллар шодон
Ўпар экан сочини,
Билганмикан, шу ёш ўғлон
Эртанинг сар лочини.
Билганмикан, порлаб турар
Бир учқун шу тилакда.
Замонининг қалби урар
Шу кичкина юракда.
Деганмикин, унга шу дам —
«Тарих юки елкангда.
Сен туфайли мангуба кўклам
Бошланади ўлкангда.
Қалбингдаги ширин ният
Машъал бўлур бегумон.
Улғай тезроқ, инсоният —
Кўзи сенда, эй ўғлон.
Улғай, ҳаёт йўлингдадир
Порлоқ тарих наҳори.
Улғай, сенинг йўлингдадир
Башарият баҳори!..»
Кўклам келди рус шаҳрига
Тўлиб оқди ирмоқлар.
Байрам қилиб чаккасига
Чечак тақди қирғоқлар.

Уфқларга оташ қалаб,
Тонг отади соғ, нафис.
Үйга чўмиб сув ёқалаб
Келар бир ёш гимназист.

У тўхтади...
Ким бор!! Ёрдам!..
Овоз келди йироқдан.
Бир ёш бола дод деб шу дам
Чақиради қирғоқдан...
Ҳаяжонда юрак урар
Фалокатда гўдак жон.
Тўлқинларга кўкрак урар
Ҳайиқмасдан мард ўғлон.
Асов тўлқин қурбонини
Олиб кетмоқ бўлади.
Ўғлон унинг ёш жонини
Халос этмоқ бўлади.
Курашади икки тўлқин,
Бир-биридан зўр келар.
Бири тортар,
 йиқар, юлқир,
Бири олға интилар.
Курашади икки тўлқин,
Бири енгар бегумон.
Бири муздир,
 бири ёлқин,

Бири ўлим,
бири жон.
Свияга¹, Свияга,
Тентак,
тошқин,
шұх
дарә!

Свияга, Свияга,
Сендек
шошқин
йүқ
асло!

Бешик-бешик тұлқининг бор.
Сувинг чопқир, тез, бироқ —
Сенга күкрак урган шунқор
Сендан күра жұшқинроқ.
Билсанг у ҳам тошқин дарә,
Аммо сендан баҳодир.
Сени баҳор қилур пайдо,
Унинг ўзи баҳордир.
Сен ер жони,
У эл шони,
Ҳаёт бергай у сенга.
Айт, ўзингдан зўр дарёни
Қандай олдинг бағрингга?!

¹ Симбирскда оқадиган дарә.

Қанча юрак,
мардлик керак
Тошқин сувга кирмоққа...
Құлларидә беҳуш гұдак
Үғлон чиқди қирғоққа.
Құлдан уни олди кимдир,
Пүстин тутди бир одам.
Бир нафасда қаердандир
Пайдо бұлды она ҳам.
Фарёд билан фарзандига
Ташланди у бечора.
О, не бұлды дилбандига
Үртанади, дил пора...

Күз очади Петя аста,
Келабошлар ўзига.
Ериб кетар шу нафасда
Дунё она күзига.
У сўрайди гул-гул ёниб
Халоскори ким дея.
— Бир гимназист...
— Ҳа, Ульянов.
— Ўзимизнинг Володя.
Она босар яна маҳкам
Дилбандини бағрига.
Қўклам келди, зумрад кўклам
Симбирск шаҳрига.

ВОЛГА БҮЙЛАРИДА

Тоғдан ирмоқ бўлиб оққан
Қор сувлари соф бўлур.
Ёш кўнгилнинг тўлиб оққан
Орзулари соф бўлур.
Ирмоқ дастлаб гул мавсуми —
Наҳоридан бошланар.
Орзулар ҳам инсон умри
Баҳоридан бошланар.
Ирмоқ тоза,
Орзу тиник,
Иккиси ҳам ўйноқдир.
Фарқи: фақат бири совуқ,
Бири эса қайноқдир.
Ирмоқ сув-ку, дилда орзу —
Ёниб турган аланга.
Ирмоқ пастга интилару,
Орзу доим баландга...

Хушнуд ўтар, соф, беғубор
Володянинг кунлари.
Ёш кўнглида на қайғу бор,
На бу ҳаёт мунглари.
У дунёдан севинч излар,
Кўзларига оқар нур.
Ҳали қалбда мурғак ҳислар,
Ҳали содда тасаввур.
Юрагида баҳорларнинг

Илиқлиги мужассам.
Тилагида наҳорларнинг
Тиниқлиги мужассам.
Кўнгил симоб қатрасидай
Беғубору
мусаффи.

Ҳам ул симоб қатрасидай
Тиниб-тинчимас асло.
Володяниң жони ўйин,
Қўним билмас бир нафас.
Кўчаларда у кун бўйи
Тўп қувишидан чарчамас.
Коńьки учган болаларнинг
Кўтарилсачуввоси,
Энг жарангдор овоз, билинг,
Володяниң овози.
Кунлар ўтар шоду хуррам,
Тунлар ширин туш кўрар...
Еш Володя ҳаммадан ҳам
Музикани хуш кўрар.
Опасига Бетховенни
Чалиб бер деб қўймайди.
У шахматда ҳар ўйинни
Жонни бериб ўйнайди.
Ўйга чўмиб хонасида
Ултиришни севар у.
Чаманлардан онасига
Гул теришни севар у.

Гоҳ қушларнинг куйлариға
Қулоқ солиб ўлтирас.
Гоҳи дарё бўйларида
Қармоқ солиб ўлтирас.
Бир нуқтага тикиб нигоҳ,
Чўмар гоҳо хаёлга.
У балиқчи отани гоҳ
Кўмар минг хил саволга.
«Айтинг, ҳеч ким шу дарёдан
Кечиб ўта оларми?
Кўкка нарвон қўйиб одам
Ойни тута оларми?
Айтинг, ота, нега энди
Кундуз оқу, тун қаро,
Юлдузчалар нима дейди
Сўзлашганда ўзаро?
Айтиб беринг, нега баҳор
Сувга кўмар дарёни,
Уфқлардан ортда не бор,
Қайда дунё поёни?»
Савол бериб ҳаёт ўқир,
Кезиб юрар у жаҳон.
Дунёнинг-ку чеки йўқдир,
Саволга ҳам йўқ поён..
Ёш идроки ёзар қанот,
Онги ёришиб борар,
Ииллар оша буюк ҳаёт
Тонги ёришиб борар.

Ота ўйчан,
Ота маъюс,
Кўзларида титрар нам.
Трўбкани сўради-ю
Хўрсинади дамба-дам.
Хира кўзлар боқар жонсиз
Сокин юзган кемага.
— Ога, нечук паришонсиз,
Уф тортасиз нимага?
Ўйларингиз
Ошиб денгиз
Узоқларга учдими?
Ёки ўгмиш, ёшлигингиз
Едингизга тушдими?
— О, жон ўғлим,
О, жон болам,
Сўра, майли ҳар нима.
Ўтмишимни эсга солма,
Мажруҳ кўнглим тирнама.
Ҳаётимни ёзса бир-бир
Достон бўлгай минг варақ.
У Волгадан узунроқдир,
У Волгадан ғамлироқ.
О, бу янглиғ достонларга
Қани бўлса ниҳоя...
Майли, эшик, сўзлаб берай
Кечмишимдан ҳикоя.

БАЛИҚЧИ ЧОЛ ҲИКОЯСИ

«Узоқларда,
Хов у зангор
Уфқлардан нарида
Оч, қашшоқ, зор
Бир қишлоқ бор,
Қалбим қолган бағрида.
О, Володя, бир вақт мен ҳам
Сен сингари ёш эдим.
Олов эдим,
Шўху бегам,
Бебошларга бош эдим.
Мен дунёда бор нарсага |
Қувонч билан боқардим.
Мен ҳар кимга,
Ҳар нарсага
Ишонч билан боқардим.
Дилга алам ёр бўлмасдан
Қалб кўкларга тенг бўлур.
Дунё кўзга тор бўлмасдан
Зах кулбанг ҳам кенг бўлур.
Отам чекиб дарду заҳмат
Боши чиқмай аламдан,
Бу дунёда кўрмай роҳат
Утди шўрлик оламдан.
Кўз очдиму меҳнат кўрдим,
Ёримади ғамхонам.

Арпа экиб очлик ўрдим,
Буғдой экдим — унди ғам.
Турмуш қаттиқ, ундан ҳам ер,
Пешона шўр — ер кўпроқ.
Ўз шўримга тўкибман тер,
Шўрроқ бўлди бу тупроқ.
Ҳаёт мени ёш чоғимдан
Ҳозирлади сафарга.
Очлик она қишлоғимдан
Қувиб келди шаҳарга.
Бунда экан қанча хор-зор,
Мендек юпун, дарбадар.
Қилма орзу, ҳар ерда бор
Тош-торозу, дейдилар.
Умид мени етаклади,
Олиб кирди заводга.
Умид...
Унинг әртаклари
Отди мени бу ўтга.
Шу соҳилда, билсанг, бир вақт!
Баржа тортиб ўтганман.
Ўз устимга алам, заҳмат
Юкин ортиб ўтганман.
Ғам тасмаси бағрим эзди,
Изи, мана, елкамда.
Волга бўйлаб қанча кездим,
Бахт кўрмадим ўлкамда.
Волга, Волга, она дарё,

Сен халқимнинг кўз ёши.
Қирғоғингдан тошар гўё
Буюк Руснинг бардоши.
Сен ўстирдинг минглаб фарзанд,
Дардинг шифо топмади.
Барча сенга бўлди ҳамдард,
Ҳеч ким даво топмади.
Сигмай оқар қучоғингга
Асрый алам, зор, нола...
— Балиқ тушди қармоғингга,
Тортмайсанми, ҳой бола!
Володя бир сескандиу,
Қармоғини тортмади.
— Давом этинг, дардига у
Нега шифо топмади?
— Қанча дилни ўртаб бу ҳол,
Қанча кўз ёш оқизган.
О, ўғлим, бу мушкул савол,
Мен жавобдан ожизман.
Ўқи, ўзинг китоблардан
Бунга жавоб излаб кўр.
Қониқмасанг жавоблардан
Ўзинг даво излаб кўр.
Менинг умрим энди тамом,
Ғамдан оппоқ бўлди соч.
Деҳқон бўлиб экдиму дон,
Аммо умрим ўтди оч.
Қанча-қанча боғ ўстирдим,

Мевасидан тотмадим.
Қанча-қанча бино қурдим,
Бир бошпана топмадим...
Узоқларда, ҳов у зангор —
Уфқлардан нарида —
Оч, қашшоқ, зор
Бир қишлоқ бор,
Қалбим қолган бағрида.
Юртдан кечган дема мени,
Фикрим азиз қишлоқда.
О, мен қурган кема мени
Элтмас она қирғоққа...»

Оқшом түшар соя-гилам
Она Волга бўйига.
Уйга чўмиб Володя ҳам
Хомуш қайтар уйига...

Она кўрса тонгда кириб,
Ухлаб ётар фарзанди.
Бу кеча у кўп ўлтириб
Нималардир ёзганди.
Кундаликнинг орқасида
Езув кўрди уч қатор:
«Инсон дарё ёқасида,
 аммо ўзи сувга зор.
Инсон ўзи бое ўстирар,
 тотиб кўрмас мевадан.

Инсон ўзи бино қуарар,
умри ўтар беватан.

ОНА ОРЗУСИ

«Үғлон, оқил ҳам мард бўлгин,
Мардлик — элга садоқат.
Дардмандларга ҳамдард бўлгин,
Йиқилганга қўл узат.
Тўсиқларни енгиб ўрган.
Енгил бўлмас йўл деган».
Ота шундай таълим берган,
Она шундай бўл деган.

Мушфиқ она кўз олдида
Ўсиб борар дилбанди.
Минг хил ният хаёлида,
Ким бўларкин фарзанди?
Володя шўх ўйинлардан
Ўзни жуда ёш тийди.
Китоб ўқир, ўқир ҳардам,
Олим бўлса кошкӣди...
Ҳар нарсани билмоқ бўлар,
Қўп қизиқар ўғлони.
Эҳтимол, у саёҳ бўлар,
Кезиб чиқар дунёни.
Тили бийрон, хати равон,

Адиб бўлса ажабмас,
Бир кун унга даври даврон
Насиб бўлса ажабмас...
Ўғли асов тўлқинларни,
Бўронларни севади.
Довулларни, ёлқинларни,
Суронларни севади.
Шамол турса ташқарига —
Отилади у доим...
Ким бўлса ҳам балолардан
Сақла уни худойим.
Она!
Унинг юрагини
Фақат она билади.
Шундай сева билгангина
Шундай ёна билади.
Ўғли билан фахрланар,
Қалби тўла орзу бор.
Севинади, аммо она
Севинчидаги қўрқув бор.
Меҳри ортар ўғлонига,
Тинглаб унинг сўзини.
Бевақт ҳаёт тўфонига
Отмасмикин ўзини?..
Мушфиқ она кўз олдида
Усиб борар фарзанди.
Минг хил ният хаёлида,
Ким бўларкин дилбанди?

Она қалбда ёлғиз орзу,
Фақатгина бир ҳавас:
Үғли тезроқ улғайсаю,
Элга нафи тегса бас.

БУ ҚАНДАЙ КИТОБ?

В о л од я

— Кишт. Йўлинг йўқ ҳеч қаёққа.
Кўлни кўтар, акажон.

С а ш а

— Шошма, қўлни кўтармоққа
Улгурамиз ҳар қачон.
(Саша бир дам бошин қашлар)
Адо қилдинг, чамамда.

В о л од я

— Ўзинг шоҳга ҳужум бошлаб
Хато қилдинг, чамамда.

С а ш а

— Ука, мени руҳинг енгди,
Бўлмаса-ку...

В о л о д я

— Ҳа, топдинг.
Енгилдингми, қани энди
Ваъда қилган китобинг?

С а ш а

— Китоб тайёр,
Аммо шарт бор.

В о л о д я

— Айтмасанг ҳам биламан.
Сир сақлайман, шубҳанг бекор,
Нима десанг қиласман.

С а ш а

— Яна бир шарт.

В о л о д я

— Ҳўш, қани, айт,
Ёмон эзма экансан.

10 43
B - 89

Саша

— Аввал китоб —
Номини топ
Қани билармикансан?

Володя

— Айт-чи, қандай белгиси бор?

Саша

— Исъёнкордир ҳар сатри...

Володя

— Лермонтовнинг, демак, бирор
Мен билмаган асари?

Саша

— Йўқ!
Бу китоб тузумнинг нақ
Юрагига отган ўқ!

Володя

— Герценми?

С а ш а

— Йўқ!

В о л о д я

— Некрасов?

С а ш а

— Йўқ!

В о л о д я

— Добролюбов?

С а ш а

— Яна йўқ!

Зўр фалсафа, даҳо идрок
Бунда жамдир. Топавер.

В о л о д я

— Монтескье?..

Руссо?..

Дидро?..

Робинеми?

Саша

— Иўқ!

Володя

— Волтер?

Саша

— Иўқ. Уни бир учқун дейми,
Е аланга деймикан...

Володя

— Айтақол, ё Белинскийми?
Чернишевскиймикан?

Саша

— Маъно ёғар ҳар гапидан,
«Қўзғал, ишчи!» хитоби.
Мана ўқи.
Бу — «Капитал»
Ҳаёт, кураш китоби!

ТУНГИ СУҲБАТ

Қиши.
Ярим тун.
Увлар бўрон,
Кўчаларда йўқ бир жон.
Зулмат ичра гўё жаҳон,
Жимжит ҳар ён.
Зимишон.
Ухлар еру ухлар осмон.
Борлиқ ухлар тинч —
Бироқ —
Тун бағрини ўйиб ҳамон
Ёнар ёлғиз бир чироқ.
На осмонда бир юлдуз бор,
На ерда бир йўловчи.
Оlam инграр — чекар озор —
Гўё уни қўлловчи —
Ёлғиз чироқ ёнар фақат
Бу зимишон бағрида.
Ёлғиз чироқ ёнар фақат
Симбирск шаҳрида.

— Ука, ахир мени тушун,
Тўлиб тошар менда куч.
Алам чеккан халқим учун
Үч олмоғим керак, ўч!
Қирқмай зулм дарахтининг

Энг забардаст шохини,
Кўрмоқ бўлмас эл баҳтини,
Ҳам битирмоқ оҳини!
Бошдан соя кетса шояд
Кулгай толе юлдузи.

— Хато ғоя!

Чуқур ғоят
Бу дарахтнг илдизи!
Уни қуриб битсин деган
Таги билан қўпоргай.
Ким илдизни очмай туриб
Аввал болта кўтаргай?
Фойда бермас, бил, шу нарса,
Орзуларинг ҳеч бўлур.
Бир кун бориб тушунарсан,
Аммо унда кеч бўлур.
— Бу мушкул йўл, лекин зинҳор
Мен қайтмасман йўлимдан.
Курашаман, қасамим бор,
Ҳеч қўрқмасман ўлимдан.

Бўрон.

Енар қор бешафқат.
Тун. Зим-зиё ҳаммаёқ.
Симбирск ичра фақат
Енар ёлғиз бир чироқ.
Енар чироқ тонгга қадар,
Саҳар кулгач сўнади...

Эрта билан Александр
Петербургга жўнади.

ҚАСАМ

Яна келди зумрад қўклам
Симбирск шаҳрига.
Яна ёйди барқут гилам
Кенг далалар бағрига.
Шўх жилғалар Волга ёққа
Чулдурашиб чопдилар.
Она очган кенг қучоққа
Пилдирашиб чопдилар.
Ҳар бир гулда, ҳар кўнгилда,
Ҳар чечакда бир баҳор.
Ҳар дараҳтда, ҳар сунбулда,
Ҳар печакда бир баҳор.
Қўклам! Дунё қанчалар кенг,
Қанча кўркам, беғубор!
Аммо нечун Володянинг
Қўзларига олам тор?
Қушлар унга қўшиқ куйлаб
Айланади бошидан.
Сочларини силаб ўйнаб
Еллар кетмас қошидан.
Яшил ўтлар қомат букиб
Бош эгади йўлига.
Аммо булар сигмас букун

Володянинг кўнглига.
Кулиб боққан тонг уфқининг
Этаклари зарҳалли.
Аммо бу ҳам бермас унинг
Ёш қалбига тасалли.
Ҳа, юз берди у ҳис қилган,
Энг даҳшатли фалокат.

Саша
кеча

қатл этилган.

О, бу машъум ҳалокат —
Володянинг юрагини
Ўйиб кетгандай бўлди.
Ўйиб бир аҳд куртагини
Қўйиб кетгандай бўлди.
Кўклам!
Шуъланг тушди элнинг
Киприкдаги ёшига.
Қанча кулфат олиб келдинг
Бир оила бошига...
Ўтар унинг кўз олдидан
Элнинг аччиқ турмуши.
Ўтар унинг хаёлидан
Балиқчи чол ўтмиши.
Кўз олдидан ўтар бир-бир
Ўша суҳбат, ўша тун.
«Курашаман, аҳдим бордир
Курашаман халқ учун...»

Уйга кирди.
Уй гүё тор,
Бўзаргандай оқ девор,
Ҳар нарсада бир алам бор,
Ҳар нарсада бир ғам бор.
Гулпечакда сўлғин бир тус,
Елга хомуш қад букар.
Бош тебратар соат маъюс,
Тинмай чиқ-чиқ ёш тўкар.
Дарча кийган кўк дарпарда,
Азадорга ўхшайди.
Бунда гапдан ҳамма нарса
Хабардорга ўхшайди.
Она хаста кўринади,
Қўтаролмас бошини.
Яширмоққа урунади
Ўғлидан кўз ёшини.
— Қўй, онажон, ким ёш билан
Ювибди ғам доғини?
Ахир инсон бардош билан
Енгар кулфат тоғини.
Фикри тоза,
Юраги пок —
Акам эди чин инсон.
Бахт йўлида бўлди ҳалок,
Қўй йиғлама, онажон!
Аммо акам излаган бахт
Миллионларнинг қўлида.

Курашаман мен ҳам албат
Шу саодат йўлида.
Қайтмасман бу муддаодан,
Бу энг юксак орзумдир.
Лекин она, мен тамоман
Бошқа йўлдан боргумдир.
Она боқар
Қўзида ёш,
Ўйга чўмган ўғлони...

Уфқлардан чиққан қуёш
Нурга кўмар дунёни.

1960—1965.

ОРЗУ ЧАШМАСИ

Қора денгиз өртаги

Кеча ойдин, баҳор айёми,
Қатра-қатра ёш тўқар булоқ.

Миртемир

ДЕБОЧА

Мовий денгиз соҳиллари,
Ложувард осмон,
Жонбахш ҳаво, бепоён сув,
Сўлим табиат.
Ер юзида жаннат бўлиб
Яралган макон
Бугун менга ором бермас,
Бермас ҳаловат.
Чағалайдек чарх уради
Бетинч ўйларим,
Түғён ичра жим кезаман
Денгиз бўйларин.

Бу дунёning ташвишларин
Унтиб тамом,
Барча бунда осойишта

Олмоқда ором.
Бунга менинг йўқми ҳаққим,
Йўқми ҳуқуқим?
Бахтсизлигим буми меним,
Саодатимми?
Бошқаларга ором берган
Бу гўзал Қрим
Олиб қўйди тинчлигимни,
Ҳаловатимни.
Мен-ку бунда қофозлардан
Қочиб келгандим,
Табиатга қучоғимни
Очиб келгандим,
Дафтарларим қайларгадир
Сочиб келгандим...
Яна ўзинг керак бўлдинг,
Кел, эй қаламим.
Сенсиз менга яшамоқнинг
Ўзи ёт экан,
Кел, эй узоқ кечаларда
Ёлғиз ҳамдамим...

* * *

«Қора денгиз,
Тўлқинли денгиз,
Этагингта туташган осмон.
Чўкиб ётар остингда чексиз
Афсонаю эртак ва достон.
Не ошиқлар севгиси билан
Юрагини кўмганлар сенга.
Денгиз,
Кўҳна ривоятлардан
Биттасини сўйлаб бер менга».
Тебранади
Оҳиста тўлқин,
Мовий денгиз тилга киради.
Сўйлаб ғамли ўтмиш эртагин,
Қояларга бошин уради...

Гўзал эди,
 Ёш эди Орзу,
 Севги учун яралган санам.
 Эркин эди гўёки оҳу,
 Тиниқ эди орзулари ҳам.
 Лабларида доимо ханда,
 Кўзларида ишва-ноз эди.
 Боғлар аро хиром этганда
 Гуллар унга пояндоз эди.
 Фунча тотмай
 Қуёш бўсасин,
 Уфқ ёпмай юзига алвон,
 Елкасига қўйиб кўзасин,
 Йўл оларди
 Кўк чашма томон.
 Ҳилпиарди ел билан ўйнаб
 Оппоқ шоҳи рўмол бошида.
 Ширин-ширин ўйларин ўйлаб
 Үлтиарди
 Чашма қошида.
 Үлтиарди сочин тароқлаб,
 Акс этарди кўзгуда жамол.
 Келажагин,
 Бахтин сўроқлаб
 Гоҳ чашмага берарди савол.
 Қоматининг бандаси сарвлар

Боши узра ташларди соя.
Майнингина шилдираб сувлар
Сўйлар эди
Қизга ҳикоя:
«Уфқларга туташган
Кўк денгизнинг ортида
Бир ўлка бор.
Унда эл
Сийнаси чок, бағри қон.
Қаро тун сочин ёйган
Бу харобот юртида
Султон номли бир золим
Халқни эзар беомон.
Тутқун қизларга тўла
Унда ҳарамхоналар,
Денгиз ўша бахтсизлар
Кўз ёшидан шўр бўлган.
Фарзандлари ҳажрида
Зардоб ютиб оналар
Интизор кечаларда
Йиғлай-йиғлай кўр бўлган...»
Ҳикояга қулоқ солиб қиз
Узоқ-узоқ
Үйга толарди.
Тўлқин урган поёнсиз денгиз
Юрагига ғулув соларди.
Кўринарди
Барн кўзига!

Гўё тунги ваҳимали туш,
Елкасида сув тўла кўза,
Қайтар әди
Уйига хомуш.

2

Ойлар ўтиб,
Фасллар ўтиб,
Ёш қўшилди қизнинг ёшига.
Харидорлар остона ўпиб
Келаберди
Ота қошига.
Узоқ-яқин овуллардану
Олис-ёвуқ элатлардан ҳам
Келаберди,
Барида орзу
Орзу дея аталган санам.
Бирисининг қўлида дунё,
Бирисида ёшлик ва қудрат.
Бири элда тенги йўқ доно,
Бири эса
Танҳо хушсурат.
Яна бири соҳибкор боғбон,
Тош устида ундиргувчи гул.
Бири наққош,
Бири сухандон,

Бири эса қўшиқчи-булбул...
Харидорман деган дамо-дам
Келаберди ота қошига.
Келаберди,
Кетаберди ҳам
Толе қуши қўнмай бошига.

3

Аслида-чи,
Гўзал Орзунинг
Ўзга ёрда эди тилаги.
Тоза гулдай қалбидা унинг
Барг ёзганди
Севги куртаги.

4

Айни баҳор кулган чоғ эди.
Сайил жойи сўлим боғ эди.
Эл йиғилган наврӯз базмига,
Барча хушнуд,
Диллар чоғ эди.
Авжда эди ўйин ва ханда,
Авжда эди танбур, чирманда.
Ёшлигини эсларди чоллар
Қиз, йигитлар лапар айтганда.
Товус каби

Айлаб хиромон,
Рақсга тушди бир гўзал жонон.
Бир-бир чиқиб барча ўша кеч
Санъатини қилди намоён.

Лекин
Чўмган каби қайғуга
Бир чеккада ўлтириб ҳамон,
Кўшилмасди
Үйин-кулгуга
Содда йигит —
Камсухан чўпон.
Энг сўнггида даврага тушиб
Аста қўлга олди созини.
Майин, дилбар оҳангга қўшиб
Сўйлаб кетди
Кўнгил розини...
«Тоғлар ошиб,
Мен бир сулув
Нигоримни излайман.
Сойдай тошиб
Кўзи оҳу
Ҳуморимни излайман.
Бунча золим
Гардуни-дун
Бунча бало бўлмаса.
Етгаймидим
Толе нигун,
Бахтим қаро бўлмаса...»

Куй чашмадай сокин оқарди,
Жим қолганди барча ҳангуманг.
Бу қўшиқда ошиқнинг дарди
Эл дардига эди ҳамоҳанг.
Орзу ҳам бор эди сайилда,
Қўшиққа банд эди хаёли.
Шу йигитга
Маҳлиё бўлиб,
Бошдан тушди шоҳи рўмоли...

5

Шу кеч уйга қайтдию Орзу,
Ололмади тун бўйи ором.
Хаёл қуши кўкка учдию,
Тинчлигини йўқотди тамом.
Мағрур қизнинг шумиди ҳоли,
Наҳот йигит дунёда танҳо?
Қизга унинг ширин хаёли
Кечалари бўлди ошно.
Қани унинг
Дилшод чоғлари,
Оҳу каби эрка юришлар?
Қани энди
Юксак тоғларни
Жаранглатиб хандон уришлар?
Ишқ савдоси у кутмай ҳали
Оташ солди ширин жонига.

Дилин очиб
Нажот сўргали,
Келди Орзу чашма ёнига.
«Кўргил, чашмам,
Паришон ҳолим,
Бир барнонинг бўлдим шайдоси.
Сўйла, чашмам,
Сўйла, зилолим,
Ишқ дардининг борми давоси?
Йигит бўлсам,
Севиб қолсам ёр,
Юрагимни қиласадим баён.
Айт,
Бўлайми севгимга иқрор,
Ё ишқимни тутайми пинҳон?»
Шунда чашма
Тилга кирди-ю,
Сўйлай кетди чулдираб бийрон:
«Ишқ дард эмас,
Ишқ саодат-ку,
Тутма асло севгингни пинҳон!
Бахтиёрсан,
Йиғлама, о, қиз!
Қалбинингни ёз севги хатига.
Мактубингни мен билан оқиз,
Оқиз, жойлаб гулбарг қатига.
Тоғ-тошларни оралаб юриб.
Севганингни топаман албат,

Даладами,
Қирдами кўриб,
Қўлларига тутқизаман ҳат.
Муҳаббати бўлса унинг ҳам,
Мажнун каби елиб қолади.
Сени излаб,
Ишонгил, эркам,
Бир кун ўзи келиб қолади.»

6

Қаро тунда
Оқ қофоз узра
Қўз ёшини юлдуздай тўкиб,
Қалбидаги энг ҳассос сўзла
Орзу ёзди
Йигитга мактуб:
«Номингни ҳам билмайман, йигит,
Мактуб ёздим ва лекин сенга.
Сайилгоҳда у кун кўрдиму,
Юрагимда ёнди аланга.
Сенга мактуб ёзмас эдим ҳам,
Қизга ишқдан сўз очмоқ ордир.
Лекин нетай ўртаниб севсам.
Айтмасга не иложим бордир?!
Уша куни ёниб куйладинг,
Ёнди шунда менинг ҳам қалбим.

Айт-чи, йигит,
Кимни ўйладинг,
Куйлаганинг ким эди,
Айт, ким?
Ким ўртади ҳажрида сени,
Кимга орзунг бўлмоқ мұяссар?
Қувонардим,
Эй тоғ лочини
Топган бўлсанг баҳтингни агар.
Мен эсам-чи,
Шайдойинг бўлиб,
Ёдинг билан яшайман мудом.
Хатим олсанг
Етказсин гулим
Сени севган Орзудан салом».

7

Сайилгоҳда
У кун чиндан ҳам
Хомуш эди Оғадўст чўпон.
Барча хуррам,
Фақат унда ғам.
Қалби эди дард билан сўзон.
Чўпон бир кун
Чашма қошида
Үлтиради най чалиб ёлғиз.
Шунда,

Оппоқ рўмол бошида
Сувга чиқди бир дилрабо қиз.
Қарадию
Лол қолди чўпон.
Тош ортига олди ўзини
Узоқ-узоқ термулди пинҳон,
Паривашдан ўзмай кўзини.
Бундай қадду
Бундай жамомини
Кўрмаганди Оғадўст асло.
Ўша кундан
Унинг хаёлин
Банд айлади шу офтоб сиймо.
Шу бўлдию
Оғадўст ҳар кун
Келар бўлди булоқ бошига.
Тош ортига беркиниб секин
Боқар бўлди соҳиби ҳусн
Гўзал қизнинг кўзу қошига.

8

Болаликдан
Ота-онасиз
Етим ўсан эди Оғадўст.
Етим эди,
Эмасди ёлғиз,
У барчага эди оға, дўст.

70

Қишлоғида хоҳ кекса, хоҳ ёш,
Барча дардкаш унга ёр эди.
Аммо унинг қалбига сирдош
Биттагина дўсти бор эди.
Шу дўстига
Пайт топиб бир кун
Айтди бошдан ўтганин бутун.
Дўсти деди:
«Сен севган дилбар
Орзу дея аталган сулув,
У не ўқтам, ботир йигитлар
Юрагига солмаган ғулув.
Кўплар унга интилган,
Аммо —
Қизнинг севган ёри бор эмиш.
Боқмас эмиш
Ўзгага асло,
Севганига вафодор эмиш».

9

Сув бўйинда ўлтирганча у
Узоқ қолди бошдан учиб ҳуш.
Йиғлай-йиғлай ухлаб қолдию,
Кўрди шу кун
Ажойиб бир туш.
Кимдир уни

Уйғотар әмиш,
Дермиш:
«Кутиб олгин вақтида.
Ер ёнингга келмоқда, дермиш
Хушбўй атиргулнинг қатида».
Уйғондию
Термилди ҳар ён,
Ҳеч кимса йўқ.
Ўртанди кўнгил.
Шу пайт бирдан Оғадўст чўпон
Сув бетида кўриб қолди гул.
Боқди. Ажаб —
Ўзи қизил гул,
Бир гулбарги нега оқ экан?
Аста тутиб
Қўлга олди ул,
Қатидаги бир вароқ экан
Оқ қофозни авайлаб очиб,
Қиз хатини ўқиди чўпон.
Ўқидиу,
Тинчин йўқотиб,
Мажнун каби югурди ҳар ён

10

Тонг отарда
Қўлида кўза

72

Сув бўйига аста чўкиб тиз,
Кўнгли каби тиниқ фируза
Чашма билан
Сўйлашади қиз:
«Зилол чашмам,
Уйноқи чашмам,
Айт, не бўлди мен ёзган мактуб?
Юракларим қон бўлди кутиб.
Қайлардадир
Мен кутган одам?
Севги хатим унга етдими?
Уқидими,
Сўйлагин, қани?
Ёки йиртиб ташлаб кетдими,
Бор эканми ўзга севгани?»
«Гўзал Орзум,
Парирўй Орзум,
Кеча олди мактубингни ёр,
Излаб сени
Тин олмай бир зум,
Қелаётир висолинга зор.
Қелаётир,
Кўзларида ўт
Қайда дея гўзал, сарвиноз.
Қелаётир,
Севганингни кут,
Чиқақолгин йўлига пешвоз»,

Қора сочин
 Ёйганда оқшом,
 Денгиз юзи бўлганда қирмиз,
 Сув бўйида
 Оларди ором
 Севганининг оғушида қиз.
 Куйлар эди йигит ишиқидан,
 Янграр эди қўлларида тор.
 Ва дилрабо, шўх қўшиқ билан
 Жўр бўларди
 Унга сулув ёр.
 «Баҳор чоги тоғлардан
 Шарқираб сой келади.
 Мени йўқлаб боғлардан
 Юзлари ой келади.
 Юзлари ой келганда
 Қўлга олай созимни,
 Оқшом пайти бўлганда
 Айтай юрак розимни
 Қучай сарвинозимни».
 «Менинг кўнглиғи олган
 Барно йигит қайдадир.
 Юрагимга ўт солган
 Танҳо йигит қайдадир.
 Уша барно йигитга
 Шоҳи рўмол тикканман,
 Уша танҳо йигитга

Жонни нисор этганман...»
Қора сочин
Ейганда оқшом,
Денгиз юзи бўлганда қирмиз,
Сув бўйида
Оларди ором
Севганининг оғушида қиз.

12

Қишлоқ бўйлаб
Тарқалди хабар,
Бўлди элнинг тилида достон.
Бу оқшом тўй,
Бу кун қўшилар —
Орзу билан
Оғадўст чўпон.
Қанчаларнинг кўзида шодлик,
Қанчаларнинг дилида армон.
Ёр бўлади букун мангалик
Орзу билан
Оғадўст чўпон.
Саҳарданоқ
Эшитган борки,
Оқаберди қизнинг уйига.
Ким дугона,
Ким дўсту ёрки,
Келаберди севги тўйига.

Келаберди тўйчи ҳофизлар,
Йўлда созлаб танбур, созини.
Келаберди раққоса қизлар
Қўрсатмоққа ишва-нозини.
Бутун қишлоқ
Бугун хуррам, шод.
Бутун қишлоқ сайилгоҳ бугун.
Яхшиларнинг диллари обод,
Ёмонларнинг кўксидаги тугун.

13

Орзу қизнинг
Ҳеч армони йўқ.
Орзусига етди ниҳоят.
Севинчининг чек поёни йўқ,
Кулиб боқди унга саодат.
Лекин бир дард чулғар ўйини.
Қиз тарк этар
Ота ўйини.
Юрагида чексиз ғалаён.
У дол этиб шамшод бўйини
— Хайр,— деди.—
Мунис отажон.
Меҳрибоним, хайр ягонам,
Унутмасман сени ҳеч қачон
Рози бўлгин қизингдан сен ҳам.

Орзу букун
 Қиз дугоналар —
 Барчасига айтди алвидо.
 Видолашди келин то саҳар
 Тақдирини билгандай гүё.
 Эрта яна
 Уйғониб наҳор,
 Қолмасин деб күнглимда армон,
 Хайрлашмоқ учун сўнгги бор
 Йўл олди қиз
 Кўк чашма томон.

Гўзал Орзу,
 О, сулув пари,
 Нега келдинг чашма ёнига?!

Билмасмидинг,
 Маккор кўзларнинг
 Қасд қилганин ширин жонингга?!

Оҳ, чашмага айтмасанг видо
 Қоларми-да мангу армонинг.
 Билмасмидинг,
 Чашма қошида
 Турганини Али бобонинг...
 Энди унинг ёзув қўлида
 Очилмайин сўзлар иқболинг.

Узоқ юртда
Зулмат элида
Ҳарамларда не кечар ҳолинг?!

15

Кўтарилиди денгиздан қуёш
Сувни бўяб қип-қизил қонга.
Қуёш билан эл кўтарди бош,
Тўйхона ҳам
Уйғонди тонгда.
Уйғондию, қўзғалди фарёд.
Барча чопди
Денгизга томон.
Ота қиласар фарёд узра дод,
Телбалардек югурап чўпон,
Йигилганда барча қирғоққа.
Узоқлардан келди қиз саси.
Кетар эди
Қалқиб йироққа
Қароқчининг машъум кемаси.
Тик қояга келдию чўпон,
Оқ елкандан узмай кўзини
Фарёд дея сўнгги бор гирён
Қояларга отди ўзини.
Барча қолди қуи эгиб бош,
Бутун борлиқ

Эгди бошини.
Денгиз узра юксалган қуёш
Сувга тўқди қонли ёшини:

16

Базм борар хон саройида
Аркони тахт хоннинг пойида.
Муғанийлар куй қиласр оғоз,
Раққосалар рақс этар серноз.
Жангдан ғолиб қайтган хон учун,
Юртни олиб қайтган хон учун
Мадҳ ўқишар сўзга моҳирлар
Шеър айтишар зукко шоирлар.
Нозу неъмат тўла дастурхон,
Энг баландда ўлтиради хон.
Гулоб дея қилади хитоб,
Соқий унга тутар майи ноб.
Бармоқ билан қилса ишора,
Кўзлари ўт, ўзи қоп-қора
Занжи келар,
Хон амрни кутиб
Ҳалқа тақсан қулоғин тутиб,
Тиз чўкканча ўлтиради жим.
Хон дер унга:
— Сўйла, эй қулим,
Нега ҳамон Али бобо йўқ?
— Қайғурма хон,

Кўнглинг бўлсин тўқ.
Сенга содиқ қул Али бобо
Фармонингни этмоқда адо.
— Унга етказ,—

Шодиёнамга
Туҳфа айлаб ҳарамхонамга
Киритмаса бир ҳур, париваш
Бу кеч менинг кўнглим бўлур ғаш.
Боши кетар Али бобонинг,
Қурбон бўлар сенинг ҳам жонинг.

17

Оҳ, Орзу қиз,
Оҳ, гўзал санам.
Оҳ, тоғларнинг эрка оҳуси.
Банди бўлдинг
Ёрга етган дам,
Хазон бўлди қалбинг орзуси.
Бераҳмлар солдилар кишан
Нозиккина оқ билагингга.
Ғам сояси тушди ишқ билан
Лим-лим тўла пок юрагингга.
Толеинга қузғун чанг солди,
Қайга етар энди оҳ-зоринг.
Она элинг узоқда қолди,
Узоқларда қолди диёринг.
Оҳ, дилрабо,

Йўқотиб сени,
Зўр тоғларнинг қадди бўлди ё.
Парчалади ёринг кўксини,
Отанг бўлди ҳажрингда адо.
Тоғ бағрига
Файз эди сенинг
Шўх қўшиғинг, дилбар карашманг.
Сен кетдингу сўлди чаманинг,
Қуриб битди беғубор чашманг.
Сен кетдингу,
Чўкди элда ғам.
Кундан кунга ортди қайғуси...
Оҳ, Орзу қиз,
Оҳ, гўзал санам,
Оҳ, тоғларнинг эрка оҳуси.

18

Ўтаберди кунлар ва ойлар,
Оқаберди дийдалардан қон.
Бахтсиз кунда,
Тутқунда гирён
Она бўлди Орзу муштипар.
Ғам ҳижрондан юраги пора,
Диёридан йироқ-йироқда,
Ўзга юртда,
Ўзга қирғоқда

Она бўлди Орзу бечора.
Сўнгсиз ғазаб қўксида оташ,
Айрилиқнинг алами ичра,
Золим хоннинг ҳарами ичра
Она бўлди
Орзу жафокаш.

19

Оқшом.
Чўкди денгизга қуёш.
Тикилганча кунботар ёққа,
Қўлда гўдак,
Кўзда қонли ёш,
Орзу чиқди баланд қирғоққа.
Дардин сўйлаб йиғлади танҳо.
Она юртга,
Севган ёрига,
Падарига -- ғамгузорига
Энг сўнги бор
Айтди алвидо.
Бахтсиз танни кучганча туриб,
Кўз ёши-ла ювди юзини.
Сўнгра бирдан
У қаҳ-қаҳ уриб,
Тўлқинларга отди ўзини..

Ҳижрон дардин енгар экан вақт,
 У ҳар қанча бўлмасин оғир.
 Йиғлаб-йиғлаб
 Орзу ғамин ҳам
 Унутдилар қишлоқда охир.
 Барча банддир
 Ўз дарди билан,
 Ўз ташвиши билан овора.
 Йиғинларда эслашар баъзан
 Не бўлди деб
 Орзу бечора.
 Ойлар ўтди
 Чопган оҳудек,
 Баҳор келди қишининг изидан.
 Бир кун тунда
 Қўлида гўдак
 Сув париси чиқди денгиздан.
 Аста қўйди гўдакни
 Чўпон —
 Кўксин урган қирғоқ тошига.
 Сукут сақлаб ўлтириди бир он,
 Сўнг йўл олди
 Чашма қошига.
 У келдию,
 Қуриган чашма —
 Кўзларидан оқиб кетди ёш.

Гўдак уни симирди ташна
Ва қумларга қўйиб ётди бош.
Кўкда сўнгги
Сайёра қолиб,
Еришганда оҳиста осмон,
Сув париси гўдакни олиб,
Юриб кетди
Денгизга томон.
Чашма худди
Она оҳудек
Кўзда ёши тирқираб қолди.
Сув париси
Қўлида гўдак,
Тўлқинларга кириб йўқолди.

ХОТИМА

Қулоқ солиб ўлтираман жим
Қора денгиз ҳикоясига.
Дардга тўла севги достоним
Мана, етди ниҳоясига.
Қора денгиз,
Тўлқинли денгиз,
Этагингга туташган осмон
Чўкиб ётар остингда чексиз
Афсонаю эртак ва достон.
Не ошиқлар севгиси билан
Юрагини кўмганлар сенга.
Денгиз,
Сонсиз эртакларингдан
Биттасини сўйладинг менга.
Кўз-кўз этар
Тонг малоҳатин,

Кўтарилар денгииздан қуёш.
Мен ўйлайман,
Ошиқ қисматин —
Уз бахтимга қиласман қиёс.
Олиб кетди ўтмишни замон,
Унут бўлди элнинг фарёди.
Кўтарилемас
Энди ҳеч начон
Орзуласнинг аламли доди,
Қайтмас бўлиб
Кетди ғам, кадар,
Зулм кетди — муҳаббат қолди.
Кетди кўкдан оғир булатлар.
Қуёш қолди,
Мангу баҳт қолди.

1964 ә. Ялта

МУНДАРИЖА

Нидо	3
Буюк ҳаёт тонги	28
Орзу чашмаси	58

На узбекском языке

Эркин Вахидов

ПРИЗЫВ

Поэмы

Редактор *Сайёр*

Рассом *Г. Бедарев*

Расмлар редактори *И. Нирков*

Техредактор *Л. Ильина*

Корректор *А. Ҳасанова*

Босмахонага берилди 19/VI-65 й. Босишига
руҳсат этилди 25/VIII-65 й. Формати
 $60 \times 90^1/32$. Босма л. 2,75. Шартли босма л.
2,75. Нашр л. 2,9. Тиражи 10 000. Индекс
поэзия. Р05914. „Тошкент“ бадий адабиёт
нашриёти. Тошкент, Навоий кӯчаси, 30.
Шартнома 53—65.

Ўзбекистон ССР Министрлар Совети мат-
буот Давлат комитетининг Ихтисослаш-
тирилган ҳарф терув фабрикасида тайёр-
ланган матрицадан 1-босмахонасида босилди.
Тошкент, Ҳамза кӯчаси, 21. Заказ № 673.
Баҳоси 17 т. 1965 й.